

Agong berkenan terima menghadap Perdana Menteri Timor –Leste
Astro Awani
02 Disember 2024
Bernama

KUALA LUMPUR: Yang di-Pertuan Agong Sultan Ibrahim berkenan menerima menghadap Perdana Menteri Timor-Leste Kay Rala Xanana Gusmao di Istana Negara, hari ini.

Turut hadir pada pertemuan yang berlangsung lebih 30 minit itu, adalah Menteri Luar Negeri Datuk Seri Mohamad Hasan, Timbalan Menteri Belia dan Sukan Adam Adli Abd Halim, Ketua Setiausaha Kementerian Luar Negeri Datuk Seri Amran Mohamed Zin dan Duta Besar Malaysia ke Timor-Leste Datuk Amarjit Singh Sarjit Singh.

Xanana Gusmao tiba di Malaysia malam tadi bagi memulakan lawatan rasmi selama tiga hari yang juga kunjungan sulung beliau ke negara ini sejak menyandang jawatan itu pada 1 Julai tahun lepas.

Terdahulu, Xanana Gusmao disambut oleh Perdana Menteri Datuk Seri Anwar Ibrahim dalam majlis sambutan rasmi, diikuti dengan mesyuarat dua hala di Seri Perdana, Putrajaya.

Turut hadir pada majlis sambutan itu, ialah Timbalan Perdana Menteri Datuk Seri Dr Ahmad Zahid Hamidi dan Datuk Seri Fadillah Yusof, anggota Jemaah Menteri, diplomat asing, dan pegawai kanan kerajaan.

Xanana Gusmao dan Anwar kemudian mengadakan mesyuarat bagi membincangkan hubungan dua hala dan potensi kerjasama antara kedua-dua negara itu, diikuti dengan satu sidang media bersama.

Anwar turut meraikan rakan sejawatannya itu dalam majlis makan tengah hari di Seri Perdana, Putrajaya.

Tahun lepas, nilai perdagangan dua hala antara Malaysia dan Timor-Leste berjumlah RM196.7 juta dengan eksport Malaysia ke Timor-Leste bernilai RM195 juta manakala import produk daripada Timor-Leste berjumlah RM1.7 juta.
-- BERNAMA

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/agong-berkenan-terima-menghadap-perdana-menteri-timor-leste-498919>